

IN DANIELEM PROPHETAM

EXERCITATIO ACADEMICA,

Quam Auspice, & Duce D. THOMA AQUINAT

PUBLICE EXHIBET

F. JOANNES MARRA.

In Neapolitano Or. Præd. ejusdem D. Thomæ Collegio
Græcarum, & Hebraicarum litterarum Auditor

AD EMINENTISS. JO. THOMAM BOXADORSIUM S.R.C. PRÆSE.
CARDINALEM AMPLISSIMUM, TOTIUSQUE OR. PRÆD.
MAGISTRUM GENERALEM.



N E A P O L I M D C C L X X V I I .

EX TYPOGRAPHIA MICHAELIS MORELLI

AUCTORITATE PUBLICA.

Exech. cap. XXVIII. v. 3.

הנה חכם אתה מנא

Matth. cap. XXIV. v. 15.

Οταν ἴδῃτε τὸ βδίλυμα τῶν ἁμαρτιῶν, τὸ ποῖον διὰ Δαυὶδ
τῶν προφῆτῶν, ὡς καὶ αὐτὸν εἶπεν· (ὁ ἀρχιερεὺς τοῦτο·) Τότε δεῦ-

P R Æ F A T I O .



Ogitanti mihi sæpenumero, VIRI CL., Supremi Judicis severitatem, qua in quosdam homines interdum ob eorum pervicaciam animadvertit; nullum aliud nec terribilius, nec atrocius supplicium visum est, quam teterrima illa, quæ sacris scriptoribus mentis cæcitas appellatur: qua qui afficiuntur, clarissimo ipsius veritatis fulgore perstricti aut offensi, in tantas tenebras præcipites ruunt, ut clausis ad manifestissimam lucem oculis, vana specie decepti, falsa pro veris libentissime amplectantur. Hæc pœna, quam se Deus Hebræorum populo irrogaturum olim fuerat comminatus (1), utinam unum illum peritiam populum tenuisset, & non etiam pari de causa, hujus sæculi sapientes occupasset! Siquidem de iis horrenda est illa Spiritus Sancti apud Jobum comminatio (2): Apprehendam sapientes in astutia eorum: per diem incurrent tenebras, & quasi in nocte sic palpabunt in meridie. Nec sane levibus de causis, sed magnis potius multisque criminibus laceffitus, gravissimum hoc supplicii genus hujusmodi hominibus clementissimus Deus inferre putandus est: aut enim terrenis caducisque rebus inbiantes, in his toti demersi, ab divinis celestibusque omnino abhorrent; aut acriori ingenii vi plurimarumque rerum cognitione elati, ad humilium disciplinam comparata Divina oracula superbe contemnunt; aut demum sapissime excisi divi-

nitus

(1) Deut. XXVIII. v. 28., & 29. Percutiat te Dominus amentia & cæcitate ac furore mentis, & palpes in meridie, sicut palpare solet cæcus in tenebris, & non dirigas vias tuas.

(2) Cap. V. v. 13., & 14.

nitus, sunt sapissime reluctati, eorum instar (1) qui dixerunt Deo: recede a nobis; scientiam viarum tuarum nolumus. Nam si ita non forent affecti, neque eos retrorsum infucata pravus opinionibus consuetudo rapuisset, nonne unius Danielis Prophetæ lectione proprias tenebras, cognita veritate, discuterent, atque ad officium reverterentur? Ecce enim Daniel, cujus monumenta præ manibus jampridem conscripta tenemus, res per quingentos & amplius annos gestas ita diserte, graphiceque longe ante descripsit, ut quidquid in præcipuis orbis terrarum imperiis eo temporis intervallo accidit, præsenferis, prædixeritque „ tanta dictorum fide, ut Prophetæ incredulis hominibus non „ videatur futura dixisse, sed narrasse præterita „ (2). Ipse Servatoris nostri prædicaturus adventum non solum ea, quæ facturus passurusque esset ante commemoravit, sed etiam tempus præsignavit, numerumque adscripsit annorum, qui ad eum usque intercessere, aperte collectis bis omnibus calamitatibus, quæ non post admissum a Judæis perfidia scelus in eos essent invasura. Ipse & Chaldaorum regibus quænam eventura, quique eorum essent disionem occupaturi, aperte prænuntiavit; atque sub emblemate & imagine modo simulacri ingentis, modo quatuor animalium e pelago emergentium celebriora terrarum orbis imperia se mutuo excipientia, atque evertentia clarissime prænovit, vivisque coloribus designavit. Darii Hystaspidos, Xersisque adversus Græcos, Alexandri M. in Asiam expeditiones, hujusque de Dario Codomanno celerrime relatas victorias, præmaturum ejusdem decessum, distributionemque parti ab eo imperii in quatuor præcipuos Duces, quantasque subinde isti mutuo sibi essent clades illaturi, pacisque postmodum inter eos fœdera, connubiorum jura, sum rursus sæva post factam reconciliationem bella, hæc omnia,

in-

(1) Job. cap. 21. v. 14.

(2) S. Hieronym. Præf. in Danielem.

inquam, aliaque id genus plura in Daniele qui percurreris, apud rerum gestarum scriptores ea ipsa se legisse putabis. Ad hæc si quis docilem animum & a præjudiciis liberum adferat, intelliget porro tantam eximii hujus vatis oraculis vim inesse, ut nemo possit esse tam cæcus, qui non videat ingentem se oculis divinam claritatem. Verum si illi pravis opinionibus pertinaciter inhaerentes obdurant sese contra manifestam veritatem, lucemque relinquunt, nos, ut inquit ille, „ non canimus surdis. „ Nostri enim agnoscetes quantum in sanctissimo illo sapientissimoque Propheta cum omni tempore, tum præsertim hac tempestate emolumenti sit ad veræ Religionis hostes refellendos, continendosque in recta fide Orthodoxorum animos, Divinissimum volumen assidue seduloque versabunt. Ea de causa, quum pro solemnī more discipulorumque exercitatione statis annis oporteat aliquot sacri codicis veteris loca explananda seligere, visum ex hoc ipso Propheta pauca rudi Minerva collecta delibare. Quod levissimum specimen gravissimī tui nominis auspicio exhibemus **CARDINALIS AMPLISSIME**. Tu namque hoc nostri erga Te studii & voluntatis indicium levidensis muneris loco jure a nobis repetis; cum ob plurima maximaque & universe & privatim in nos collata beneficia, nostramque tanto Duci debitam observantiam; tum potissimum quia toto vitæ tuæ genere & instituto maximam cum argumenti quod tractamus scopo & fine obtines affinitatem. Nam pridem re ipsa (quod equidem maximi est momenti) Christianæ Religionis osoribus ostenderas posse ejus cultores, etsi clarissimis natalibus ortos, omnique opum copia affluentes, suavi servatoris gratia adjutos, sæculi deliciis blandimentis pompisque, contra depravatæ naturæ vim, valedicere, severumque institutum alacriter amplecti. Quum vero felicissimus dies ille illuxisset, quo ad supremum Prædicatorii Ordinis culmen evehctus es, universi fausta omnia maximaque in Ordinem redundatura esse bona augurabantur. Nec suæ eos fefellerunt spes. Siquidem ab ipso susce-

*susceptæ salutaris gubernationis initio quum animadvertisses
 duplici potissimum armorum genere sacrosanctam Religionem
 ab hoste imperi , & subtilibus argumentis ex Metaphysica
 depromptis , (qua in Disciplina Angelicus Præceptor noster
 S. THOMAS , ut in ceteris aliis omnibus præstantissimus est
 & pene Divinus) & ad primigenios textus provocatione ; Tu
 ambabus istis impressionibus adversariorum prudenter occurristi :
 nam & Angelicæ doctrinæ , unde maxima in Ordinem nostrum
 commoda numquam non redundarunt , arctius ejus Alumnos illi-
 gari , sanctiusque ac religiosius ejusdem placita servari , fontem-
 que ipsum adiri jussisti : Linguarum vero Orientalium studia ,
 quorum olim nostra Familia eximios cultores protulit , ut cum
 primis ab hominibus nostris colerentur semper cordi tibi fuit .
 Ex quo facto ut grandis nobis utilitas , sic non exiguus præ-
 clarissimis virtutibus tuis cumulus & bonos accessit ; tantorum-
 que memoria meritorum apud nostros florebit sempiterna . Nunc
 vero quoniam apud Pontificem Maximum Pium VI. eum locum
 tenes , ut in primis carus habearis , ab eodemque in Amplissimum
 Cardinalium Ordinem sis cooptatus , faxit Deus , ut diuturna
 felicitate usus , Ordini nostro pari benevolentia consulas ; tu-
 selamque ejus , ut ipse sannisti , Successoribus tradas .*



C A P U T I.

בשנת שלוש למלכות יהוקים מלך יהודה בא נבוכדנאצר
מלך-בבל ירושלם ויצר עליה

*Anno tertio Joakimi Regis Juda venit Nebucadnesar
Jerusalem, & obsedit eam.*

QUOD hic *anno tertio* Joakimi gestum esse scribitur, pugnare videtur cum eo, quod est *Jerem.* 25. 1. notatum; *in anno*, inquit, *quarto Joakim filii Josia regis Juda*; *ipse est annus primus Nabuchodonosor regis Babylonis*. Qui igitur fieri potuit, ut Nabuchod. *anno tertio Joakimi* (quod hic legitur) Jerosolimam expugnaverit, quum anno ejusdem quarto juxta Jeremiam regnare cœperit? sed reipsa nullam inter utrumque vatem pugnam inesse deprehendemus, si scriptorum in rebus enarrandis consuetudinem meminerimus. Solent enim illi in subducendis annis summam ex cœptis etiam conficere, & promiscue annum vel inceptum, vel absolutum adhibere; quod hic contigit; nam quod de anno tertio jam exacto *Daniel*, de anno quarto ineunte accepit *Jeremias*. Quæ explicatio nonnullum etiam in re grammatica præsidium habet; nam כשנת שלוש, *in anno tertio* reddi aptius potest: *post annum tertium*; ut & *Exo.* 2. 23. כימים הרבים i. *post dies multos*, quemadmodum LXX. græce transfulerunt: *ποῦν δὲ τὰς ἡμέρας πολλὰς*.

Hæc hujusce nodi expediendi ratio multo commodior est illa, quam Calvinus *comment.* in hunc locum adinvenit, afferens, Danielem de Nabuchodonosore patre hic sermonem habere, Jeremiam vero de filio, qui ob res præclare gestas magni sibi cognomen peperit: pro certo enim habet ambos eos Reges eodem nomine fuisse. Sed præterquamquod istius Nabuchodonosoris a Magno illo diverſi, quique profanis scriptoribus Na-

bopolassar dicitur , nulla usquam in sacris literis mentio est; facile intelligitur Danielelem non de alio quopiam Nabuch. esse locutum , quam de eo , qui se ceterosque nobiliores Judæorum adolescentes captivos Babylonem traduxit ; At nulli ante Nabuchodonosorem M. Judæi Babylonem abducti leguntur , ut ex sacra Historia , & ex Beroso proum est intelligere .

Anno igitur tertio absoluto, quarto autem ineunte Nabuchod. magnus Joakimum debellavit , Danielelemque cum sociis Babylonem captivum duxit. Nec quemquam movere debet quod aduersus hanc sententiam *Maldonatus* attulit ex *Jerem.* 52. 28., ubi videtur Propheta Judæorum neminem ante annum 7. Nabuchod. Babylonem perductum prodidisse . Siquidem fallitur vir doctus: *Jeremias* enim loquitur de ampliori quadam & promiscua populi Judaici abductione : *iste est populus* , ajens , *quem transtulit Nabuchodonosor : in anno septimo Judæos tria millia , & viginti tres .* At *Daniel* hoc loco captiuitatem delectorum quorundam Iuuenum recenset , qui essent „ e prole regia , eque principibus , formosi , vitii omnibus expertes , disciplinarum scientes , ut in Regia stare possent , & literas & linguam chaldæorum doceri “ ut ex versiculis 3. & 4. hujus Capituli liquet . Quod miror egregium alioquin Interpretem *Maldonatum* non vidisse .

Verum *Josephus* l. 10. Ant. c. 7. tradit anno quarto Joakimi Nabuchodonosorem quidem in ipso Regni exordio bellum intulisse *Ægyptio* Regi , atque ab hoc *Syriam* omnem usque ad *Pelusium* abstraxisse , at nequaquam *Judæam* , nedum *Ierosolimam* , attigisse ; quin nonnisi anno quarto postquam ipse regnare cœpit , Joakimi autem octavo , primam in Judæos expeditionem suscepisse subdit . Sed fidem non habemus *Josepho* contra expressum scripturæ , imo & *Berosi* ab ipso non semel producti testimonium narranti . Hæc autem ille refert , quæ cum recitatione *Danielis* magnopere consentiant : „ quum au-
„ dif-

„ diffet , ajens , Pater ejus Nabopollassarus ; qui in Ægypto ,
 „ Syriaque Cele , & Phœnicia , præpositus fuerat , defecit ,
 „ se , ipse ferendis laboribus per ætatem impar filio Nabu-
 „ chodonosoro adhuc juveni tradidit partem exercitus , ut de-
 „ fertorem bello peteret . Hic autem cum eum aggressus ef-
 „ set , prælio ipsum cepit , omnemque regionem iterum sub im-
 „ perium redegit . Sub id tempus evenit , ut Pater ejus Na-
 „ bopollassarus , cum morbum contraxisset , in Urbe Babi-
 „ lone de vita decederet ; postquam regnaverat annos / vigin-
 „ tinovem . Nabuchodonosor post id simul ac Patris morbum
 „ intellexit , rebus Ægypti , vicinarumque regionum bene or-
 „ dinatis , amico cuidam commisit captivos ex *Judeis* Phœ-
 „ nicibus , & Syris , & ex Ægypti populis una cum exerci-
 „ tu , rebusque aliis fervari dignis reportandos Babylonem ;
 „ Ipse cum comitibus paucis breviori per desertum via Ba-
 „ bylonem se contulit . Ibi cum reperisset res a Chaldeis ad-
 „ ministrari , & ipsum regnum asservari ab eorum peritissi-
 „ mo totum patris , quod fuerat , imperium adeptus est , ca-
 „ ptivisque conspectis jussit illis idoneas per Babylonicum Im-
 „ perium Colonias assignari , ipse vero de belli manubiis Be-
 „ li , aliaque templa ornavit “ . Hactenus ille apud *Jos. p.*
li. cit. , & l. 1. contra *Apionem* .

Igitur in priori illa expeditione Nabuchod. juxta Berosum
 omnia ferme gessit , quæ hoc capite a Daniele narrantur , ac
 proinde memoria lapsus est Josephus his contraria scribens (1) .

A 2

Cu-

(1) Exciderant nimirum *Josephus* , quæ ex *Beroso* narrave-
 rat , dumquæ multiplex *Nabuchodonosoris* in Judæos expeditio
 in scripturis expressa simul ejus observabatur animo , facile
 ipsi contigit ut res diverso tempore gestas commisceret . Qua-
 re , quam non dedita opera peccarit , non meruit vir gravis-
 simus acrem illam & illiberalem Joannis Calvinii censuram :

Fuit

(IV)

Cujus errorem, quum fugere atque emendare debuissent acuti quidam & eruditi nostræ ætatis Critici, magno ingenii conatu renovare conati sunt, ac in primis *Petrus Brinchius* (1): qui nulla solida ratione innixi, duplex commenti sunt Joakimi regni initium; prius quo a Pharaone Nechao, excluso Joachazo fratre, Rex est constitutus; alterum quo a Nabuchod., imposito tributo sub jugum missus est.

Verf. 2. ויתן ארני בידו את יחזקים מלך-יהודה ומסצת

Tradidit autem in ejus manum Dominus Jebojakim Regem Judæ.

In potestatem quidem Regis Chaldæorum devenit, at minime regnare desit: supplex enim ac vestigialis factus Tyranno, traditis obsidum loco nobilibus, libertati denuo regnoque restituitur. Ex hoc autem loco, & ex 4. *Reg.* 24. non apparet *Joakimum* Babylonem traductum a Chaldæis fuisse, quamvis non pauci sint, qui contra opinentur, ducti auctoritate 2. *Paralip.* c. 36. v. 6. ubi juxta vulgatam habetur: *vinctum catenis duxit in Babylonem*. Sed bene est quod docti piique viri animadvertunt *vi duxit* solemni scripturæ & primigenii textus phrasi tantumdem esse, ac *ducere in animo habuit*. Cui expositioni hebraicus ipse fons non contradicit, qui ad verbum ita redditur (2): *vinnit omni ad ducendum*, seu *ut duceretur Babylonem*.

Verf.

Fuit homo indoctus & minime exercitatus in scriptura. Horribile fuit illud Dei judicium, quod Sacerdos fuerit tam brutus homo, ut est Josephus.

(1) *Exam. Chron. & hist. Fl. Josephi* c. 6. n. 4

(2) ויִּנְנִיתוּ לְחַלְיָבוֹ בַּבֶּלָה

Verf. 3. ויאמר חמור לאספנזו רב סריסיו לחבוא סבני ישראל &c.
Dixit vero Asphenazo, Eunuchorum præfecto, ut adduceret de filiis Israel &c.

Perperam ex hoc loco, & ex voce סריסיו inferretur Danielem cum sociis exsectum fuisse. Quamvis enim (origine sua exsectos significare non abnuerim) סריס (סריס enim chaldaice est avulsus) nego tamen eam vocem quocumque demum loco in sacris literis reperiatur, pro *spadonibus*, seu castratis usurpari. Ut ecce Putiphar *Gen.* 40. 1., licet maritus סריס Pharaonis vocatur, itemque dum *Gen.* 41. 1. Præfecti pincernarum, & pistorum similiter nominantur; non statim consequitur ipsos fuisse castratos. Ita E. G. quod in vocibus *Senator*, *πρωτοβουλος* usuvenit, ut ab ætate primum impositi, deinde ad officium denotandum transferrentur; hoc ipsum perinde accidisse in eâ hebræa voce tenendum est, ut nempe a priori nominis etymo deflexa quovis significaret, qui aliquod in aula regia obsequium, aut ministerium exhiberent. Sicut contra græca vox *ιουρχος* quæ originis ratione *lecticustodem* designabat, pro *castratis* usurpari coepta est, postquam Principes, potissimum Orientales, non aliis quam castratis uxorum, filiarumque curam commiserant. Quare, quamvis hoc loco Daniel Præfecto Eunuchorum traditus describatur, non inde tamen inferas cum Hebræis eundem fuisse eviratum; præsertim cum nullis custodiendis mulieribus adhibitus sit. Nec Isaïæ Vaticinium 4. *Reg.* 20. quo prædixerat Ezechîæ Judæ Regi fore, ut pro inanis gloriæ culpa posterius ejus fierent סריס Regis Babylonii, quidquam evincit: satis enim poenarum dedisset Ezechias, si pueri e regia ejus stirpe fati alienigenæ barba- roque regi servi futuri essent.

(VI)

Verf. 21. ויהי תיאל ער—שנה אחת לכורש המלך.

*Fuit autem Daniel usque ad annum primum Cyri.
Regis.*

Si quis hujus commatis hanc dicet esse sententiam, ut Daniel vixerit usque ad annum primum Cyri, post quem sit fato functus, procul dubio falletur: capite enim 10. hujus libri legimus oblatum Prophetæ fuisse visum *anno tertio Cyri*. Ergo vel per illa verba non intelligitur certum, ac determinatum tempus; quod Hebræus, & Græcus Textus videntur innuere, qui sic habent ער—שנה אחת; *ios ius ius*; i. *usque ad annum unum*; quasi voluerit indicare Propheta superstitem se fuisse usque ad regnum Cyri, qui laxata captivitate Judæis in patriam remeandi facultatem concessit: quæ est opinio doctissimi Theodoret. Si autem pressius vulgatæ velimus insistere, dicemus: particulam *usque* non semper in sacris litteris signare rei gestæ terminum, post quem res illa desierit, sed permittere interdum, rem ultra terminum illum excurrere. Sicut Jeremias cap. 1. dicitur vaticinia edidisse *usque ad transmigrationem Jerusalem*; & tamen novimus, eundem Prophetam etiam ultra id tempus prophetasse.



C A P U T II.

ובשנה שנים למלכות נבוכדנצר חלם נבוכדנצר חלומות ותהפכם.
ורחו ושנתו נהיה עלי

*Anno secundo regni, Nebuchadnesar somnia habuit,
quibus animus ejus territus est, & somnus abruptus.*

Non levis hîc statim sponte sua omnium animis objicitur difficultas; cur nempe secundus Nabuchodonosoris annus dicatur, quum

quum ad minimum quartus regni ejus annus esse debuisset: nam a Joachimo debellato, & ab Daniele abducto, qui solidum triennium in condiscendis Chaldæorum litteris contrivit, quatuor saltem anni jam effluerant. *Josephus* lib. 10. *Antiq.* una cum Gentilium suorum turba secundum hic annum dictum censet, non ex quo regnum gubernandum suscepit, sed ab Ægyptiaca vastitate, & ab insigni quadam, quam de Ægyptiis, Syris, Idumæis, Ammonitis, aliisque finitimis populis reportaverat, victoria. Hæc difficultatis dissolvendæ ratio, quamvis ceteris aptior videri possit, quæ ad hunc nodum expediendum adferuntur; minus tamen secura viris clarissimis visa est, quod minime cum sacra, profanaque historia cohæreat. Satiùs itaque est, ut dicamus, Nabuchodonosorem simul cum patre quatuor regnasse annos, deinde mortuo parente, solum; ita ut qui secundus hic dicitur regni annus, & secundus erat, & quartus ad diversa numerandi principia revocatus: quartus nimirum ex quo fuerat a patre in regni adscitus societatem; secundus vero a patris obitu, a quo totum imperium summo jure solus obtinuit. Nec diversa hæc annos regum putandi ratio præter veterum scriptorum morem censenda est: solebant enim prisce Orientis reges, ut auctor est *Herodotus* lib. 1. c. 7., heredes suos regio titulo adornare, quum eos mitterent, aut proficiscerentur ipsi ad gravem aliquam expeditionem: historici autem de summa annorum regni eorundem locuti, utramlibet numerandi rationem sequi in more habuerunt.

Hebræa autem vox שֹׁנְאָה (quæ & *gen.* 41. 8. somnii Pharaonis causa adhibetur) i. *conterritus, percussus*, seu *contritus fuit spiritus ejus*, perspicue indicat, somnium non fuisse vulgare: neque enim tunc primo somniare coepit rex; neque ita fuit exterritus singulis noctibus, ut omnes Magos arcessi juberet: terror igitur, quem Deus regis animo incusserat, id eum facere coegit. Quamquam autem exacte somnii non meminerat; manserant tamen in ejus animo (ut bene ani-

animadvertit S. Hieronymus) vestigia quædam , & veluti lineamenta , per quæ , referentibus aliis , reminisci posset eorum , quæ viderat , & nequaquam eum deciperent mentientes .

Hujus autem ætatis increduli (ut hoc obiter dicamus) non omnibus solum omnino somniis fidem abrogant ; verum etiam illa cachinnis , & sibilis excipiunt . Sed si illi apud ceteros , sapientes existimari vellent ; in primis somniorum delectum habere debuissent : nam etiam solius naturæ lumini , unisque profanis auctoribus inhærendo , temere negare id , quod omnis ætatis , omniumque gentium , & locorum historici memoriæ prodiderunt (ut scite animadvertit P. Baylus hac in re minime suspectus) plane indicium est animi aut parum ingenui , aut brevis intelligentiæ (1) . Et certe nonnulla extiterunt insomnia , quibus graves etiam , probatique viri fidem præstiterunt : ut fuit Calphurniæ somnium Julii Cæsaris uxoris , ante ejusdem necem vulgatum ; somnium
item

(1) Je croi que l'on peut dire des songes la même chose à peu-pres que des sortilèges : ils contiennent infiniment moins de mystères que le Peuple ne le croit , & un peu plus que ne le croient les Esprits forts . Les histoires de tous les tems , & de tous les lieux rapportent , & à l'égard des songes , & à l'égard de la Magie , tant de faits surprenans , que ceux qui s'obstinent à tout nier se rendent suspects , ou de peu de sincérité , on d'un défaut de lumière qui ne leur permet pas de bien discerner la force des preuves . Une préoccupation outrée , ou un certain tour d'esprit naturel leur bouche l'entendement , lors qu'ils comparent les raisons du pour avec les raisons du contre . P. Baylus in Dict. crit. A. Majus . R. D. Idem alibi , quum somnium quoddam , reipso comprobatum , Joannis Maldonati ex Alegambe retulisset , subdit . De tels faits , dont l'Univers est tout plein , embarrassent plus les esprits forts qu'ils ne le témoignent . A. Maldonat K.G.

item Medici illius, qui iussit, Augustum, quo die pugnatum est, extra tentorium efferri: quandoquidem somniaverat, ut reipsa accideret, castra ab hostibus capta. Idem de quibusdam id genus aliis iudicium esto.

Nec proinde omnia *tu irapagmā* tum veterum, tum recentiorum deliramenta consectamur: quamvis e postremis quidam claros habeat admiratores (1). Nec dubitamus, quin multa, quæ de somniis referuntur, sint fabulis amandanda; sicut & non ambigimus, pleraque somniorum natura ipsa, vel occasione ex diversis causis oriri, nempe vel ex diurnis cogitationibus; ut si quæ fuero interdiu meditatus, noctu mihi in somniis objiciuntur: qua de re verissima censemus,
B quæ

(1) Hic nempe est Junianus Majus, qui saculo XV. Neapoli magna cum laude humaniores litteras docuit; cujus vim in somniis interpretandis duo celebriores ejus discipuli Alexander ab Alexandro, & Jacobus Sannazarius magnopere commendaverunt. Prior enim Genial. dier. lib. I. cap. II. ita loquitur de illo: Somniorum omnis generis ita verus conjector fuit, ut ipsius responsa, Divina fere monita haberentur. Ad eum me mini, cum puer adhuc essem, & ad capiendum ingenii cultum frequens apud eum ventitarem, quotidie somniantium turbam, hominesque celebri fama, & multi nominis, de somniis consulum venisse. Declarabat ille non breviter, aut subobscore, ut plerique, sed exposite, atque aperte ænigmata somniorum, sive boni, sive mali prænumcia: ita apte, ut iudicium factum a veridico diceret. Multi quoque illius monitu, vitæ interitum, nonnumquam animi ægritudines, vitarunt.

quæ ex Epicuri sententia cecinit Petronius in Satyr (1) ;
Deinde varii adfectus animi vel corporis etiam somnia pa-
riunt ; ut si quis tristitiam secum in lectum adferat , vel
ex amici morte , vel ex aliquo damno , vel ex injuria sibi
illata , vel rebus quibuslibet adversis , somnia item concipiet,
quemadmodum illa animi præparatio feret : corpus etiam ipsum
somnia generat ; ut videmus eos , qui febre laborant , nunc
fontes imaginari , si ipsos sitis urgeat ; nunc incendia , nunc
multas alias imaginationes concipere .

Sunt igitur hæ naturales, & humanæ, ut ita dicam, plerumque
somnia causa, sed præter eas nullas alias causas superiores
admittere , quæ in hominis animum imprimant interdum per
somnia imagines, quæ futura portendant, hominis est aut nullas
pu.

Alter autem Eleg. VII. lib. II.

At tibi venturos , Mai , prædicere casus

Fas est , & mites consuluisse Deos .

Nec tantum aræ fumos , aut nuntia sentis

Fulgura , sed stygiis somnia missa locis ,

Somnia , quæ miseram perturbant sæpe quietem ,

Dum mens incertis pendet imaginibus .

O quoties per te vanum posuisse timorem

Me memini , & lætos continuasse dies !

O quoties , trepidus cum non spernenda putarem ,

In nostrum cavi damna futura caput !

Sæpe &c.

(1) *Somnia , quæ mentes ludunt volitantibus umbris ;*

Non delubra Deum , nec ab æthere numina mittunt ;

Sed sibi quisque facit . Nam cum prostrata sopore

Urget membra quies , & mens sine pondere ludit ;

Quidquid luce fecit , senectus agit , oppida bello

Qui quatit , & flammis miserandas sævit in urbes &c.

putantis esse naturas humana majores, aut si ponat, easdem in corpora agere posse negantis : quorum utrumque est a ratione & a SS. scripturis alienum : ut alias pluribus ostenditur. Atque ita sacræ litteræ passim, & somnia divinitus immitteri, & somniorum divinitus immisissorum exempla tradunt. Hinc Jobi 33.15. *Loquitur Deus per somnium in visione nocturna, quando irruit sopor super homines. & dormiunt in lectulo: tunc aperit aures virorum, & erudiens eos instruit disciplina; Ut avertat hominem ab iis, quæ facit, & liberet eum de superbia; eruens animam ejus a corruptione, & vitam, ut non transeat in gladium. Non absimilia leguntur Job. 4. 13. Num. 11. 6. & alibi.*

Verf. 2. ויאמר חסר לקרא לחרטמים ולכשרים ולמשפמים
Et jussit rex vocari ariolos, & magos, & maleficos, & Chaldaeos.

Varia hæc sunt nomina hominum diversis studiis conjectandi augurandive addictorum. Quid singula presse distingeque significant explicare adeo facile non est. Generatim divinandi, atque futura conjiciendi vocabula sunt. Ac prima quidem hebræa vox חרטמים a Græcis *incantatores* vertitur, i. *incantatores*; videnturque S. Hieronymo esse illi, qui verbis rem peragunt: quamvis vocis origo generatim *occultorum scientes* designet. Altera vox משפמים videtur idem significare, quod græcum Σοφοι: eadem enim prorsus elementa utraque in lingua reperiuntur. S. Hieronymus autem reddidit *Magos*, non in malam partem vocabulum sumens, sed juxta suam originem, qua *Philosophi* seu *rerum contemplationi addicti*, significantur: quare in commentariis inquit: *Magi sunt, qui de singulis philosophantur.* חכמים autem recte eidem S. Doctori sunt malefici, qui sanguine utuntur & victimis, & sæpe contingunt corpora mortuorum; qui proinde a Grotio *Necromantes* ex *Jacchradis*

sententia adpellantur : Reddi etiam vox potest eodem sensu cum aliis *præstigiatores* ; ut & *Exod. 7. v. 11.* Postrema denique vox כַּשְׁדִּים *astrologos* certe denotat, seu *genethliacos*, qui ex unicujusque themate eventus vitæ solebant prædicere : seu qui ex astris, aliisque signis res futuras, & occultas prænunciabant. Et si autem nomen hoc gentile esset, Sacerdotes tamen sibi illud præcipue vendicarunt, quasi penes ipsos esset totius gentis nobilitas, & præstantia. Quamobrem ut *Arabs* pro latrone, *Chamanæus* pro mercatore ; ita *Chaldæus* pro Astrologo non semel apud Auctores usurpatur. Nam quum gens illa additissima esset Astrologiæ ; præcipue autem in ea scientia excellerent Sacerdotes Chaldæorum ; factum est, ut hi, teste *Diod. Sicul. l. 2.* simpliciter Chaldæi nominarentur. De quibus sic *Cicero lib. 1. de Divin.* : *Chaldæi*, inquit, *non ex artis, sed ex gentis vocabulo nominati, prædicere dicuntur quid cuique even- surum, & quo quisq. fato natus esset.* Strabo quoque *lib. 6.* *constituta est habitatio peculiaris in Babylonia Philosophis indi- genis, plurimum astronomiam tractantibus, qui Chaldæi adpel- lantur. Sunt ex eis, qui e natalibus hominum eventura iis vaticinabantur.* Idem apud *A. Gellium*, & *Juvenalem* vide- re est.

Verf. 40. וּמָלְכוּ רִבְעִימָה הַקִּימָה כְּפָרְלָא בַל קַבֵּל דִּי פִרְזָלָא
סְרוּק וְחֶשֶׁל כְּלָא &c.

Es regnum quartum erit velut ferrum : quomodo ferrum comminuit, & domat omnia, sic commi- nuet, & conteret omnia hæc.

In celeberrimo illo simulacro Nabuchod. regi per quietem viso, nulla unquam inter sacros Doctores controversia fuit, quænam regna, priora duo simulacri membra portenderent. Nam quoad prius attinet perspicuum est Danielis testimonium, ita *Babylonium regem alloquentis; tu es caput aureum.* Quum ve- ro *Cyrus Persarum Medorumque rex Babyloniorum regnum evertit, Persicæque Monarchiæ fundamenta jecerit ; clarif- sime*

sime consequitur ; non aliud per pectus & brachia argentea præsignari , quam Persarum imperium . Quænam autem imperia per alias duas statuarum partes denotentur , non satis inter eruditos convenit . Sed si semel constitutam explicandi normam , & rationem sequamur , ut illud proxime in regnorum serie intelligatur , quod antè diruerit , illudque statim exceperit , non video cur hac de re potuerit esse inter doctos viros tanta dissensio . Siquidem si Persarum imperium secundum in ordine collocemus , quia proxime secutum fuit Babylonium ; quum Græci subinde Persas exceperint , ac denique Romani Græcos in suam ditionem redegerint ; clare patet , non aliorum fuisse regnum tertium , nisi Græcorum ; nec proinde aliud quam Romanorum , quartum imperium existisse .

Verum illi tertium regnum Alexandri Macedonis esse ajunt ; quartum autem Seleucidarum , & Lagidarum , seu regum Syriæ , & Ægypti , qui præcipui velut duos surculi fuerunt ex magno illo Alexandri stipite oriundi . Sed perperam illi Lagidarum , & Seleucidarum imperia ab Alexandri Magni imperio , (quod brevissimum fuit) tamquam omnino diversa distrahunt ; quum potius animadvertere debuissent , sub emblemate *ventris duorumque femorum* omnia tertio esse loco comprehensa . Reges enim Syriæ , & Ægypti minime Alexandri regnum destruxerunt , sed ex Imperatoris sui veluti manu dominium acceperunt : Græci enim & ipsi fuerunt , & una cum Alexandri Magni imperio unum Græcorum imperium constituerunt . Hinc Angelus Daniele alloquens *cap. 8. v. 21.* perspicue ex utrisque unum imperium facit , quum sub una eademque hirci caprarum figura , Alexandri successorumque ejus regnum comprehenderit , ajens : *hircus caprarum , rex Græcorum est , & cornu grande , quod erat inter oculos ejus , ipse est rex primus . Quod autem fracto illo surrexerunt quatuor pro eo ; quatuor reges de gente ejus consurgent , sed non in*

in fortitudine ejus : Cujus etiam sententia fuisse videtur L. Paullus Æmilius in oratione , quam eodem die habuit , quo Perseum Macedonum regem devicit : *præsens* , ait , *fortuna mutatio exemplum nobis ante oculos ponit communis imbecillitatis humanae , & nihil durabile , nec firmum esse docet* *Alexandri successionem ; qui in altissimum dignitatis culmen evasis , unius horæ particula everfam conspici- tis (1) .* Quid quod extrema , i. quarta Monarchia stante , Divinus reparator orbis Messias proditurus erat ? Scriptura enim discrete loquitur : *In diebus regnorum illorum suscitabit Deus Cali regnum , quod in æternum non dissipabitur &c.* (de quo mox sermonem sumus facturi) Porro Christus Mundo adparuit tum , quum reges Ægypti , & Syriæ nulli essent , Romanorum autem imperium tunc maxime flo- reret .

Verf. 44. וְבוֹמִיתוּחַ דִּי מַלְכִּיָּא אֲנוּךְ יָקִים אֱלֹהֵי שְׁמַיָּא מַלְכוּ דִּי לַעֲמִיץ
 לֹא תִהְיֶה כָּל וּמְלֻכוּתָּהּ לַעֲמִי אַחֲרָי לֹא תִשְׁתַּבֵּחַ מִחוּסְתָּךְ
 כְּלָאִיז מְלֻכּוּתָּא וְהִיא תְּקוּם לַעֲמִיָּא :

In diebus regnorum illorum suscitabit Deus Cali regnum , quod in æternum non dissipabitur , & regnum ejus alteri populo non tradetur : comminet autem & consumet universa regna hæc , & ipsum stabit in æternum .

Vehementissime mirari subit, Hugonem Grossum gravissimum virum , quintum hoc regnum a Deo Cali suscitandum ad impe- rium Romanum retulisse : quum adeo magnifica , splendidaque epitheta : *In æternum non dissipandum , alteri Populo non tra- dendum , in æternum duraturum* , nulli alii , nisi spiritali Christi regno attribui possint . Jamdudum enim vetus Romanorum im-

(1) . *Apud Plutarchum in L. P. Æmilio .*

imperium dissipatum est, Francisque, Germanis, Turcis, aliisque traditum est. Nec quemquam aut parilis adhuc servatae appellationis, aut ejusdem loci ratio fallat; quum nec nomen, aut locus, sed gens & reipublicae forma faciat imperium; quam antiqui Romani imperii formam nulus non videt modo oblitteratam esse. At contra cernimus spirituale Christi regnum adhuc firmum perdurare, & juxta Danielelem hoc loco, aliorumque oracula Prophetarum in aeternum illud duraturum, constantissime profitemur. Isaïas namque cap. 9. De Messia verba faciens, *filius est*, inquit, *principatus super humerum ejus . . . multiplicabitur ejus imperium . . . super solium David, & super regnum ejus sedebit, ut confirmet illud, & corroboret in judicio, & justitia amodo, & usque in sempiternum*. Michaeas etiam cap. 4. *De Sion egredietur lex, & verbum Domini de Jerusalem. Et judicabit inter Populos multos & corripiet gentes fortes usque in longinquum . . . , & regnabit Dominus super eos in monte Sion ex hoc nunc, & usque in aeternum*. Sed clarius Daniel ipse cap. 7. ; *Aspiciebam in visione noctis, & ecce cum nubibus Caeli quasi Filius hominis veniebat, & usque ad antiquum dierum pervenit, & in conspectu ejus obtulerunt eum, & dedit ei potestatem, & honorem, & regnum, & omnes Populi, tribus, & linguae, ipsi servient: potestas ejus, potestas aeterna, quae non auferetur, & regnum, quod non corrumpetur*. Quibus veterum sacrorum Vatum oraculis concinunt Angeli Gabrielis ad Mariam Virg. verba de nascituro Christo asserentis: *hic erit magnus, & Filius Altissimi vocabitur, & dabit illi Dominus Deus sedem David Patris ejus, & regnabit in Domo Jacob in aeternum, & regni ejus non erit finis*. Lucæ I. Deinde lapis (quo nomine apud Prophetas Messias adumbratur) qui ingentem illam Statuæ molem percusserat atq. contriverat, sine manibus *De monte abscissus* dicitur, h. e. sine vi, atque ope humana. Dici autem nequit, Romanorum im-

im-

(XVI)

imperium sine manibus, i. humana industria, & vi crevisse, quum potius militum virtute, & robore, aliisque humanis adminiculis in maximum illud potentiae fastigium pervenerit. Grotii autem evasio, qua ad Romanum imperium superiora Danielis verba refert, *quatenus futurum erat sedes Ecclesiae*, nullius momenti est. Quandoquidem cum Huetio (1) a Grotio petimus: quum hoc ait, vel sibi vult in Romano imperio Ecclesiam solam spectari, vel Ecclesiam cum Romano imperio. Si primum, profecto verisimile non est Daniele maticiniis suis nobilissima notantem imperia, longe omnium nobilissimum, Romanum praeteriisse; si postremum, falsum est, quod affingit Danieli, Romanum imperium numquam dissipatum iri, cujus vix umbra nomenque superest.



C A P. III.

*V. 24. Et ambulabant in medio flammæ laudantes Deum;
& benedicentes Domino.*

Hæc periocha cum aliis, quæ sequuntur usque ad 90. hujusce capitis comma in Hebræis voluminibus S. Hieronymi ætate non extabat, ut ipse testatur in præfat. & comment. ad hunc locum Danielis. Sed procul dubio extiterant Theodotionis ætate, & aliorum Græcorum interpretum: nam alioquin ex quonam fonte hausissent illi, qui Hebræorum volumina Græcis se auribus reddere profitebantur? Nec profecto catholica Ecclesia in comitiis Tridentinis in librorum Divinorum canonem suscepisset, ni veteris Ecclesiæ traditione, & auctoritate permota, eas particulas in Hebræo fonte extitisse divinitus edocta comperisset. Nam utut illæ ex hebræis codicibus, vel

tem-

(1) *Dem. Evang. Prop. 9. c. 8.*

tempora injuria ; vel alia quacumque de causa incomperta nobis exciderint , exploratissimum sane est (ut recte adversus *Dupinium R. Simonius* (1) advertit) Judæos Hellenistas late per orbem diffusos , in suis Synagogis eas prælegisse tamquam ex hebraicis fontibus haustas : dictionisque character hebraïsmum redolens idipsum magnopere confirmat. (2) Quare florentissimæ olim totius christiani Orbis Ecclesiæ Romana, Alexandrina , & Africana (quod ex recensione *Innocentii I. Origenis* , *Athanasii* , & *Augustini* constat) ut illas a Judæis Hellenistis acceperant quam diligentissime custodierunt .



C A P. IV.

Verf. 30. בַּה שְׁעָתָא מְלֵחָא סָפַח עַל נְבוּכַדְנֶצַּר וּמֶד־אִנְשָׁא שָׂרִיד וְעֵשְׂבָא כְּתוּרִין יֹאכֵל וּמִטְל שְׁמַיָּא נִשְׁמַח יִצְטָבֵע׃
Eadem hora sermo completus est super Nabuchod. & ex hominibus abjectus est , & fenum , ut bos comedit , & rore cali corpus ejus infectum est &c.

In hac miranda Regis Nabuchud. μεταμορφωσις , (cujus etiam Ethnici scriptores meminere (3)) explosa tamquam erronea Origenistarum sententia , qui ut pleraque alia hanc regis transmutationem ad allegoriam detorquebant , præ oculis habendum est

(1) *Critique des Prolegomenes de la Bible* L. 1. c. IV.

(2) *Hujusmodi est illud quod ex ver. 25. Maldonatus recitat. Stans autem Azarias &c. quæ pbrasis similis profecto est illi 3. Reg. 8. 55. stetit & benedixit Ecclesiæ : & sexcentis aliis .*

(3) In his Abydenus , qui apud Eusebium lib. 9. præpar. Evan. , ait *Nabuchodonosorem , quum superbia elatus esset , divinitus furore correptum .*

est S. Augustini effatum (1) : *Hæc* (quæ de transformationibus arte Dæmonum hominibus videntur acciderè , qualia Apulejus libris , quos *asini aurei* titulo inscripsit , sibi ipsi accidisse , aut indicavit , aut finxit) *vel falsa sunt , vel tam inusitata , ut merito non credantur . Firmissime tamen credendum est , Omnipotentem Deum omnia posse facere , quæ voluerit , sive vindicando , sive præstando .* Nec propterea confutatione dignam ducimus nonnullorum Rabinorum opinionem , qui Nabuchod. transmutationem non aliam , quam quæ Pythagoreis statuebatur animarum *μετεμύωσις* , fuisse credidere . Itaque ut Patrum de hac re dicta conciliemus , statuendum est , nullam regis substantialem transmutationem ex homine in brutum extitisse , sed dumtaxat *κατὰ φύσιν* *ἀνθρώπου* regem immutatum fuisse ; facultatibus videlicet cum corporis , tum animi secundum accidentia transmutatis . Nisi enim ipsi idem corpus , eademque prorsus anima fuisset , nec quæ de ipso apud Daniele narratur , vera forent , nec idem pœnas dedisset , qui peccarat . Ergo in ipsa regis anima intellectus mutabatur , quum ipse sese belluam existimans , sponte sylvas adiret , fenum , ut bos appeteret , ac bestiarum ritu hominum consortia respueret : iudicium corrumpebatur , quum nec consilia admitteret , neque belluinas ab humanis actiones fecerneret . Memoria item rerum hætenus gestarum , necnon disciplinæ a teneris sibi traditæ interciderant . Sensuum humanorum usus gravissima lædebatur , quum æstus , ac frigora , aliasque cæli injurias non sentiret . Quo factum est , ut vestibis e corpore ademptis , nudus incederet ; cibos ferinos , stomacho jam corrupto cuperet , iidemque ipsi , palato infecto , saperent ; ac denique orationis humanæ usus ablatum esset : cui enim rationis usus plane ereptus est , hunc etiam oris,

(1) *Lib. 18. de civ. cap. 18.*

oris, linguæque humanæ usus destituit. Par consequebatur in corpore corruptio: primum enim illud ipsum ferreis compedibus vinciebatur, quemadmodum cum furiosis menteque captis fieri solet, ne sibi, vel aliis noxæ esset. Victus demum, ut rem paucis absolvamus, gressus, atque habitus pristini immutatio accedebat.



C A P. V.

Verf. 30. בַּח בְּלִילִיָּא קָטִיל בַּלְטַאֲסָר מֶלֶכָא כַּשְׂדִּיָּא

Eadem nocte interfectus est Baltassar, rex Chaldeus.

Baltassar hic e stirpe Nabuchodonosoris postremus furculus; hoc capite ejusdem filius non semel appellatur, sed revera fuit Nabuchodonosoris e filia nepos; quum ex Hebræi sermonis consuetudine vox בַּח late pro nepote, aut abnepote, quin etiam aliquando pro genere sumatur. Post *Nabuchodonosorem* enim fato functum regnum obtinuit filius ejus *Evilmereodachus*, quem quum interfecisset *Neriglissares* sororis suæ maritus, filium reliquit *Baltassarem*; qui quidem ab insignibus rerum Chaldaicarum scriptoribus *Beroso*, *Megasthene*, & *Abydeno* vocatur *Laborsoarchodus*, seu *Labosfordacus*. Nam dubio procul eadem est persona diverso nomine, ut passim accidit, apud profanos, atque sacros scriptores designata: utrobique enim & ultimus Chaldæorum rex, & violenta morte oppressus dicitur.

וריוש מדיא קבל מלכותא כבר שנין שתיין וזרחין
Et Darius Medus successit in regnum annos natus
sexaginta duos.

Celeberrima est controversia , quisnam fuerit iste Darius Medus , qui , occiso Baltasare , Chaldæorum regno potitus fuerit . S. Hieronymus , & post ipsum magna sacrorum interpretum turba , Josephum & Xenophontem duces secuti , asserunt , Darium istum Medum non alium esse , quam Xenophontem Ciaxarem , filium Astyagis , Cyrique avunculum , quocum junctis copiis , postremo Chaldæorum rege interfecto , ceperit Babylonem . Hanc etiam nos olim viam ingressi sumus , dum de more exercitationes in Isaïam annis superioribus edebamus . Quæ explicandi ratio post tales tantosque viros etsi inoffenso pede defendi possit ; quia tamen juxta præclaram SS. DD. *Augustini* (1) , & *Thomæ* (2) regulam juvat in expositione sacrarum litterarum , præcipue si res ardua ac difficilis sit , non uni tantum mordicus interpretationi adhærere , sed & plures adprobare , quo facilius adversus infideles Divinorum oraculorum veritas defendatur : idcirco & aliam hic apponimus explicationem magnorum virorum ; qua quum usus fuisset *Scaliger* (3) ; tantum abest , ut acerrimus ejus adversarius Dionysius Petavius contradixerit , quinimmo firmioribus munierit argumentis . Igitur posthabito Xenophonte , de quo Cicero in priori ad Q. Fratrem epistola : *Cyrus* , inquit , *ille a Xenophonte non ad historiæ fidem scriptus , sed ad effigiem justî imperii* ; Berosum , Megasthenem , & Abydenum sequamur , qui & antiquissimi sunt , & e Babylonicis archivis & annalibus historiam se ex-

pres-

(1) 12. Conf. & super gen. ad lit.

(2) Quæst. 4. de Potentia , ar. 1.

(3) L. vi. de emendatione temporum :

pressisse testantur. Hi autem tres memoriae prodiderunt (1), post Nabuchodonosorem Nabopolassar filium, tres illius vel posteros, vel propinquos imperasse, *Evilmerodachum* filium, *Neriglissarem* generum, *Laborosoarchodum* nepotem ex filia, in eoque Nabuchodonosoris defecisse stirpem. Hoc enim conjuratione principum interemto, *Nabonidus*, ut eum Berosus nominat, vel *Nabannidochus*, ut est apud Megasthenem, princeps & ipse conspirationis, consensu omnium rex delectus est, nulla cum *Laborosoarchodo* propinquitate conjunctus. Ex quibus sic ratiocinatur Petavius: „ Postremus e stirpe Nabuchodonosori a Daniele memoratur Balthassar: huic Darius „ Medus proxime successit *cap. 5. v. 31.* At ex Beroso, Megastene, & Abydeno constat Laborosonochodum æque Nabuchodonosori posterorum fuisse postremum, & successorem habuisse.

(1) *Non pigebit hic referre Berosi & Megasthenis testimonia, quæ prostant apud Jos. I. contra Ap., & apud Euf. l.9. Dem. Ev. Prior enim ita loquitur: Ναβουχοδονόσορος μὲν ἦν, μετὰ τὸ ἀφ᾽ ἑαυτοῦ τὴν προηγουμένην τέχνην, ἐμπιστὼν εἰς ἀβρὰμῶνα μετηλλάξατο τὸν βίον βασιλευκῶς ἐπὶ μὲν τῆς δὲ βασιλείας χρόνος ὅταντο υἱὸς αὐτῆς Εὐιμαράδουχος· ἔτος προσαὶ τῶν πραγμάτων ἀνέμους καὶ ἀστεργῶς, ἐπιβουλευθεὶς ὑπὸ τῆς τῆν ἀδελφῆν ἔχοντος αὐτῆς Νηριγλισσορόρου ἀνιερθεὶ βασιλεύσας ἐπὶ δύο: i. Nabuchodonosorus postquam incepisset murum (Babylonis) prædictum, incidens in morbum vitam cum morte commutavit, quum regnasset annos XLIII. Regni vero dominus fuit filius ejus Evilmaraduchus. Is quum rebus præfuisse injuste & libidinose per insidias a Neriglissaro, qui sororem ejus habebat, occisus est. Megasthenes vero: Ναβουχοδονόσορος μὲν θεοπίστας παράχρημα ἠφάνιστο· ὃ δὲ οἱ παῖς Εὐιμαράδουχος ἐβασίλευε· τὸν δὲ ὁ κηδεὶς ἀποκτείναντες Νηριγλισσορόρου λαπὶ πάλω Λαβασσορόρου: Nabuchodonosorus quidem vaticinatus evanuit. Filius vero, qui ei erat Evilmaraduchus regnavit, hunc vero sororis ejus vir Neriglissares mactavit, & reliquit filium Labassorarchum.*

„ buisse Nabonidum. Ergo sicut Laborosoarchodus idem est, ac „ *Baltassar*, *Nabonidus* idem erit ac *Darius Medus* “. Quid quod *Cresias*, qui quum *Herodorum* ex professo impugnandum suscepit, mendacique convincere; in hoc tamen cum Herodoto concordat: ultimum Medorum regem Astyagem extitisse: tum hunc ipsum regno exutum a Cyro; Persasque subinde post Astyagem Media potitos? Quare ficta videntur, quæ de Cyaxare, & Dario Medo Astyagis filio, vel successore jaclantur.

Dicitur autem a Daniele Darius iste *Medus*, i. ut ipsemet expressit *cap. 9.* de semine Medorum, quia a Medis oriundus erat: ut enim conjicit Scaliger, Pater ejus Assuerus seu Oxyares e Media profugus, aut illius certe majores, Babylonem confederant.



C A P. IX.

Verf. 24. e 25.

שבעים שבועים נחמד
מן-מצא דבר להשיב ולבנות ירושלם עד-משיח נניח
שבעים שבועה ושבעים ששים ושנים

Septuaginta hebdomades abbreviata sunt

*Ab exitu sermonis, ut iterum adificetur Jerusalem,
usque ad Christum ducem hebdomades septem, &
hebdomades sexaginta duæ erunt .*

Pro eo, quod vulgata ex Græco *Σεπτuaginta* reddidit, *abbreviata* sunt, reddi aptius poterat vox Hebræa נחמד *constituta*, seu decretæ sunt ita, ut sensus sit 70. Hebdomadas in consilio SS. Trinitatis esse decretas, determinatas, & præcise constitutas, ut nullo casu sint mutandæ: quod enim Deus decernit, certissime eveniet. Porro ex celeberrimo isto Danielis vaticinio clarissime evincitur adversus Judæorum perfidiam, Messiam jamdiu venisse. Nam hujusce vaticinii scopum esse Messiam

&